

Inzko: Već vidljiv jači angažman EU



Visoki predstavnik i specijalni predstavnik EU za Bosnu i Hercegovinu Valentin Inzko istakao je danas da trenutna serija posjeta Bosni i Hercegovini na visokom nivou ukazuje na povećan angažman EU u BiH. Inzko se danas u Sarajevu sastao sa predstavnicima Višegradske grupe zemalja. Pozdravljajući posjetu političkih direktora iz Mađarske, Poljske, Slovačke i Češke Republike, visoki predstavnik i specijalni predstavnik EU Inzko je naglasio da je EU zabrinuta u pogledu trenutnog zastoja u formiranju vlasti u BiH.

Visoki predstavnik i specijalni predstavnik EU informirao je sagovornike o ogromnom kašnjenju u pogledu formiranja vlasti na državnom i federalnom nivou i štetnim posljedicama koje to ima po građane cijele zemlje. "Ovdje se radi o demokratskim vrijednostima i vladavini zakona", naglasio je visoki predstavnik i specijalni predstavnik EU. Ovo kašnjenje u formiranju vlasti predstavlja ozbiljnu prepreku za napredak BiH na putu članstva u EU. "Ministri vanjskih poslova zemalja EU upozorili su na sastanku koji su održali u ponedjeljak u Briselu na negativne posljedice koje bi to moglo imati", rekao je visoki predstavnik i specijalni predstavnik EU Inzko.

"Politički lideri treba da pokrenu konstruktivan dijalog koji će rezultirati formiranjem vlasti bez daljnjeg odlaganja", naglasio je visoki predstavnik i specijalni predstavnik EU Inzko. "Bosni i Hercegovini su potrebne vlasti koje će se

usredsrediti na pokretanje ekonomije, borbu protiv kriminala i korupcije i aktivnosti koje će ovu zemlju učiniti funkcionalnijom. Daljnje odugovlačenje rješavanja ovih pitanja predstavlja rizik koji može dovesti i do odlaganja evro-atlantskog programa", rekao je Inzko.